

欽定宋史

卷百八
十七
九十一

宋史卷一百八十七

元中書右丞相總裁脫脫等修

兵志第一百四十

兵一

禁軍上

宋之兵制大槩有三天子之衛兵以守京師備征戍曰禁軍諸州之鎮兵以分給役使曰廂軍選於戶籍或應募使之團結訓練以爲在所防守則曰鄉兵又有蕃兵其法始於國初具籍塞下團結以爲藩籬之兵其後分隊伍給旗幟繕營堡備器械一律以鄉兵之制今因舊史纂脩兵志特制于熙寧保甲之前而附之鄉兵焉其

軍政則有召募揀選廩給訓練屯戍遷補器甲馬政八
者之目條分而著之以見歷朝因革損益之不同而世
道之盛衰亦具是矣嗟乎三代遠矣秦漢而下得寓兵
於農之遺意者惟唐府衛爲近之府衛變而召募因循
姑息至於藩鎮盛而唐以亡更歷五代亂亡相踵未有
不由於兵者太祖起戎行有天下收四方勁兵列營京
畿以備宿衛分番屯戍以捍邊圉于時將帥之臣入奉
朝請獷暴之民收隸尺籍雖有桀驁恣肆而無所施於
其間凡其制爲什長之法階級之辨使之內外相維上
下相制截然而不可犯者是雖以矯累朝藩鎮之弊而

其所懲者深矣咸平以後承平旣久武備漸寬仁宗之世西兵招刺太多將驕士惰徒耗國用憂世之士屢以爲言竟莫之改神宗奮然更制於是聯比其民以爲保甲部分諸路以隸將兵雖不能盡拯其弊而亦足以作一時之氣時其所任者王安石也元祐紹聖遵守成憲迨崇寧大觀間增額日廣而乏精銳故無益於靖康之變時其所任者童貫也建炎南渡收潰卒招羣盜以開元帥府其初兵不滿萬用張韓劉岳爲將而軍聲以振及秦檜主和議士氣遂沮孝宗有志興復而未能光寧以後募兵雖衆土宇日蹙況上無馭將之術而將有中

制之嫌然沿邊諸壘尚能戮力効忠相與維持至百五十年而後亡雖其祖宗深仁厚澤有以固結人心而制兵之有道綜理之周密於此亦可見矣

禁兵者天子之衛兵也殿前侍衛二司總之其最親近扈從者號諸班直其次總於御前忠佐軍頭司皇城驛驥院皆以守京師備征伐其在外者非屯駐屯泊則就糧軍也太祖鑒前代之失萃精銳於京師雖曰增損舊制而規橰宏遠矣建隆元年詔殿前侍衛二司各閱所掌兵揀其驍勇升爲上軍老弱怯懦置剩員以處之詔諸州長吏選所部兵送都下以補禁旅之闕又選強壯

卒定爲兵樣分送諸道其後代以木梃爲高下之等散給諸州軍委長吏都監等召募教習俟其精練卽送闕下二年改左右雄捷左右驍武軍並爲驍捷左右備征爲雲騎左右平遠爲廣捷左右懷德爲懷順四年賜河東樂平縣歸降卒元威以下二百六十六人衣服錢絹有差立爲効順指揮乾德二年詔遼州降軍宜以効順懷恩爲名三年四月詔改西川感化耀武等軍並爲虎捷九月上御講武殿閱諸道兵得萬餘人以騎兵爲驍雄步軍爲雄武並隸侍衛司且命王繼勲主之給緡錢俾娶妻繼勲縱之白日掠人妻女街使不能禁帝聞大

怒捕斬者百人小黃門閹承翰見而不奏亦杖數十開
寶七年泰寧軍節度使李從善部下及江南水軍凡千
三十九人並黥面隸籍以歸化歸聖爲額太平興國二
年詔改簇御馬直曰簇御龍直鐵騎曰日騎龍捷曰龍
衛控鶴曰天武虎捷曰神衛骨朶子直曰御龍骨朶子
直寬衣控鶴曰寬衣天武雄威曰雄勇龍騎曰雄猛八
年改濮州平海指揮爲崇武雍熙四年改殿前司日騎
鋤直指揮爲捧日鋤直曰騎改爲捧日驍猛改爲拱辰
雄勇改爲神勇上鐵林改爲殿前司虎翼腰弩改爲神
射侍衛步軍司鐵林改爲侍衛司虎翼至道元年帝閱

禁兵有挽彊弩至一石五斗連二十發而有餘力者顧謂左右曰今宇內阜安材武間出弧矢之妙亦近代罕有也又令騎步兵各數百東西列陣挽彊弩視其進退發矢如一容止中節因曰此殿庭間數百人爾猶兵威可觀况堂堂之陣數萬成列者乎咸平三年詔定州等處本城廳子無敵忠銳定塞指揮已並升充禁軍馬軍雲翼指揮依逐州軍就糧令侍衛馬軍司管轄定州揀中廳子第一充雲翼第一第二充雲翼第二相州廳子第一充雲翼第三第二充雲翼第四保州無敵第一充雲翼第五第二充雲翼第六忠銳充雲翼第七威勇

軍無敵第一充雲翼第八第二充雲翼第九忠銳充雲翼第十靜戎軍無敵充雲翼第十一寧邊軍無敵充雲翼第十二北平塞無敵充雲翼第十三深州無敵充雲翼第十四北面諸處應管本城定塞指揮已下鎮定州高陽關路都總管並充禁軍馬軍雲翼指揮纔候升立訖分析遂指揮員兵士人數就糧州府本指揮見存去處以聞四年詔陝西沿邊州軍兵士先選中者並升爲禁軍名保捷五年正月置廣捷兵士五指揮五月命使臣分往邠寧環慶涇原儀渭隴鄜延等州於保安保毅軍內與逐處官吏選取有力者共二萬人各於本州置

營升爲禁軍號曰振武指揮旣而帝曰邊防闕兵朝廷
須爲制置蓋不得已也候邊鄙乂寧卽可銷弭六月以
河東州兵爲神銳二十四指揮神虎十指揮又升石州
廳子軍爲禁軍又以威虎十指揮隸虎翼景德四年詔
河東廣銳神銳神虎軍以見存爲定額缺則補之大中
祥符元年詔侍衛步軍司閤保寧軍士分爲四等其第
一等徙營亳州永城縣餘聽歸農無家可還者隸諸州
爲剩員四年宣示永安縣永安指揮兵八千餘人以奉
諸陵其知軍額猶隸西京本城廂軍可賜名奉先指揮
升爲禁軍在清塞之下八年置禁軍左右清衛二指揮

在雄武弩手之上散卒月給鐵錢五百以奉宮觀仁宗
卽位海內承平而留神武備始幸安肅教塲觀飛山雄
武發砲命奉日天武神衛虎翼四軍爲戰陣法拔其擊
刺騎射之精者稍遷補之由天聖至寶元間增募諸軍
陝西蕃落廣銳河北雲翼京畿廣捷虎翼効忠陝西河
東清邊弩手京西江淮荆湖歸遠總百餘營康定初趙
元昊反西邊用兵詔募神捷兵易名萬勝爲營二十所
募多市井選慙不足以備戰守是時禁兵多戍陝西並
邊土兵雖不及等然驍勇善戰京師所遣戍者雖稱魁
頭大率不能辛苦而摧鋒陷陣非其所長又北戍及川

峽荆湘嶺嶠間多不便習水土故議者欲益募土兵爲
就糧於是增置陝西蕃落保捷定功河北雲翼有馬勁
勇陝西河北振武河北京東武衛陝西京西壯勇延州
青澗登州澄海弩手京畿近郡亦增募龍騎廣勇廣捷
虎翼步鬪步武復升河北招收無敵廳子馬陝西制勝
并州克戎騎射麟州飛騎府州威遠秦州建威慶州有
馬安塞保州威邊安肅軍忠銳嵐府州建安登州平海
皆爲禁兵增內外馬步凡數百營又京東西河北河東
江淮荆湖兩浙福建路各募宣毅大州二營小州一營
凡二百八十人尙嵐軍別置床子弩砲手時吏以所募

多寡爲賞罰格諸軍子弟悉聽隸籍禁軍闕額多選本城補填故慶曆中外禁廂軍總一百二十五萬視國初爲最多西師旣罷上患兵冗帑庾不能給乃詔省兵數萬人皇祐二年川峽增置寧遠五年江淮荆湖置教閱忠節州一營大州五百人小州三百人於是宣毅寢廢不復補而荆湖廣南益募雄略至和二年廣桂邕州置有馬雄略明年併萬勝爲十營其後議者謂東南雖無事不宜弛備嘉祐四年乃詔荆南江寧府揚廬洪潭福州募就糧軍號威果各營於本州又益遣禁軍駐泊長吏兼本路兵馬鈐轄選武臣爲都監專主訓練於是東

南稍有備矣七年宰相韓琦言祖宗以兵定天下凡有
征戍則募置事已則併故兵日精而用不廣今二邊雖
號通好而西北屯邊之兵常若待敵之至故竭天下之
力而不能給不於此時先慮而豫備之一旦邊陲用兵
水旱相繼卒起而圖之不可及矣又三路就糧之兵雖
勇勁服習然邊儲貴踊常苦難贍若其數過多復有尾
大不掉之患京師之兵雖雜且少精然漕於東西廣而
易供設其數多得彊幹弱枝之勢祖宗時就糧之兵不
甚多邊陲有事則以京師兵益之其慮深而其費鮮願
詔樞密院同三司量河北陝西河東及三司權貨務歲

入金帛之數約可贍京師及三路兵馬幾何然後以可贍之數立爲定額額外罷募闕卽增補額外數已盡而營畸零則省併之旣見定額則可以定其路馬步軍一營以若干爲額仍請覈見開寶至道天禧慶曆中外兵馬之數蓋開寶至道之兵太祖太宗以之定天下服四方也天禧之兵真宗所以守成備豫也慶曆之兵西師後增置之數也以祖宗之兵視今數之多少則精冗易判裁制無疑矣於是詔中書樞密院同議樞密院奏開寶之籍總三十七萬八千而禁軍馬步十九萬三千至道之籍總六十六萬六千而禁軍馬步三十五萬八千

天禧之籍總九十一萬二千而禁軍馬步四十三萬二千慶曆之籍總一百二十五萬九千而禁軍馬步八十二萬六千視其所募兵寢多自是稍加裁制以爲定額英宗卽位詔諸道選軍士能引弓二石彊弩四石五斗送京師閱試第升軍額明年併萬勝爲神衛三年京師置雄武第三軍時宣毅僅有存者然數詔諸路選廂軍壯勇者補禁衛而退其老弱焉蓋治平之兵一百十六萬二千而禁軍馬步六十六萬三千云熙寧元年十二月詔京東武衛四十二指揮並分隸河北都總管司六指揮隸大名府路三十六指揮均隸定州高陽關兩路

更戍其休番者選差兵官三人依河北教閱新法訓練
仍差使臣押教又詔京東路募河北流民招置教閱廂
軍二十指揮以忠果爲額青鄆淄齊州各三指揮濟兗
曹濮州各兩指揮三年十二月樞密使文彥博等上在
京開封府界及京東等路禁軍數帝亦參以治平中兵
數而討論焉遂詔殿前虎翼除水軍一指揮外存六十
指揮各以五百人爲率總三萬四百年在京增廣勇五
指揮共二千人開封府界定六萬二千人京東五萬一
千二百人兩浙四千人江東五千二百人江西六千八
百人湖廣八千三百人湖北萬二千人福建四千五百